

**Kultureqarnermut, Ilinniartitaanermut, Iisimatusarnermut Ilageeqarnermullu
Ataatsimiititaliap**

**Meeqqat Atuarfianni atuartut akornanni pimmatiginnittarneq pinaveersaartinniarlugu
periusissiamik kingusinnerpaamik UPA2020-mi saqqummiunneqartussamik
Naalakkersuisut peqquneqarnissaannik Inatsisartut aaliangiiffigisassaattut siunnersuut.
Periusissiap atuutsinneqalernissaanut suliniutit assigiinngitsut qaqugukkut
aallarnisarneqarnissaannut piffissalersuut ilanngunneqassaaq.
*Inatsisartunut ilaasortaq Aqqa Samuelsen, Inuit Ataqtigiit.***

Pillugu

ISUMALIUTISSIISUTAA

Siunnersuutip aappassaanneerreqarnerani tunniunneqartoq

Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap
suliaqarnermi kingullermi makkuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Mimi Karlsen, Inuit Ataqtigiit, siulittaasup tullia
Inatsisartunut ilaasortaq Laura Táunâjik, Siumut
Inatsisartunut ilaasortaq Nivi Olsen, Demokratit
Inatsisartunut ilaasortaq Sofia Geisler, Inuit Ataqtigiit

UPA2019-imi ulloq 8. maj 2019 siunnersuutip siullermeerlugu oqallisigineqarnerata kingorna
siunnersuut Ataatsimiititaliamit misissorneqarpoq.

1. Siunnersuutip imarisaa siunertaalu

Meeqqat Atuarfianni atuartut akornanni pimmatiginnittarneq pinaveersaartinniarlugu
periusissiamik Naalakkersuisut suliaqarnissaannik peqquneqassasut siunnersuuteqartup
kissaatigaa. Tamatuma saniatigut pitsaaliuinnermut periusissiap atuutsinneqalernissaanut
suliniutit assigiinngitsut qaqugukkut aallarnisarneqarnissaannut piffissalersuut
ilanngunneqassasoq kingusinnerpaamillu UPA2020-imi Inatsisartunut
saqqummiunneqassasoq.

2. Ataatsimiititaliap siunnersuummik suliarinninnera

Pimmatiginnittarnerup pinaveersaartinnissaanut Nuna tamakkerlugu ataatsimuulersitsisumik

pitsaaliuinnermut periusissiaq pillugu siunnersuutip siullermeerneqarnerani Inatsisartut isumaqatigiittut tapersersuinerat ataatsimiititaliap iluarinartippaa. Qularutissaanngitsumik akisussaasut pimmatiginnittarnerup pinaveersaartinnissaanut amerlapput - angajoqqaat, ilaqqat, ilinniartitsisut, ikinngutit aamma innuttaaqataasut.

Pimmatiginnittarneq nutaajunngilaq. Pissutsit assigiinngitsorpassuusinnaapput soorlu qanoq isikkoqarneq, ilaqtariinneq, sinnganeq il.il. siornatigut pimmatiginnittarneq illuatungeriit amerlasuutigut imminnut ilisarisimasut akornanni pisarsimasoq, pimmatiginnittarneq ullumikkut ersinngitsumi pisarpoq ilaatigut attaveqatigiittarfiit pissutigalugit. Taamaammat pimmatiginnittarneq angerlarsimaffiup atuarfiullu eqqaaniinnarani ullumikkut sukkanerusumik siammartipallattarpoq, taamaasillunilu aqukkuminaallilluni.

Misissorneqarsinnaanera eqqarsaatigalugu pissutsit ataatsimiititaliap ilanngunneqaqquai

- Attaveqatigiittarfitsigut pimmatiginnittarneq.
- Pimmatiginnittarnerup pinaveersaartinneqarnerani illuatungeriit iliuuserisinnaasaat, ulluunerani paaqqinnittarfiit, atuarfik ilinniartoqarfiillu eqqorneqarsinnaammata
- Illuatungeriit attuumassuteqartut pimmatiginnittarnerup pinaveersaartinnissaanut ulluunerani paaqqinnittarfiit, atuarfiit ilinniartoqarfiillu avataanni pisartut taakkununga pinaveersaartitsinerit eqqunneqarsinnaanerat
- ulluunerani paaqqinnittarfiit, atuarfiit ilinniartoqarfiillu akimorlugit ilisimasaqartunut, ilaqtariinnut, ikinngutinut soorluttaaq allanut attuumassuteqarsinnaasunut periusissiaq sammitinneqassasoq.

Ulluunerani paaqqinnittarfinni pimmatiginnittarneq pillugu suliniut "Kammagiitta" ataatsimiititaliap ilisimaarivaa. Suliniut "Fri for Mobberi", pileqqaarnerani Maryp aningaasaateqarfianit aamma Red Barnetimit ineriartortinneqartoq, Maryp aningaasaateqarfia LEGOp aningaasaateqarfia, Red Barnet, Kommunit, KANUKOKA aamma Naalakkersuisut suleqatigalugit ingerlaqqittumik ineriartortinneqarpoq, Kalaallit Nunaanni Kammagiittamik taallugu – Fri for Mobberi. Siunnersuutigineqartoq nuna tamakkerlugu pilersaarut akuersissutigineqassappat, ataatsimiititaliap, pimmatiginnittarnerup pinaveersaartinniarneqartarnissaa pillugu nuna tamakkerlugu periusissiami pitsaaqutit pitsaanngitsortaalu sapinngisamik "Kammagiittap" nalilersornerani ilannguteqqullugit Naalakkersuisunut inassutigissavaa. Nuna tamakkerlugu periusissiami periarfissat atorlugit "Kammagiittap" pineqartumi suliniutinut iluatsittumik ataatsimut katiterlugit ilanngunneqarsinnaanera ataatsimiititaliap isumaliutigeqquaa.

2.1 Naalakkersuisut allannguutissatut siunnersuutaat

Siunnersuutip siullermeerneqarneranut atatillugu pingaartillugu ulluunerani paaqqinnittarfinniit inuussuttunut ilinniartarfiit ilanngullugit tamakkiisumik iliuuseqarfiginissaata pingaaruteqarnera Naalakkersuisut ersarissarpaat. Tamanna tunngavigalugu Naalakkersuisut ima allannguutissatut siunnersuuteqarput:

Meeqqanut sulii atualinngitsunut, meeqqat atuarfianni inuusuttullu ilinniarfiini pimmatiginnittarnerup pinaveersaartinniarneqartarnissaa pillugu nuna tamakkerlugu periusissiamik kingusinnerpaamik UKA2020-mi Naalakkersuisut peqquneqarnissaannik Inatsisartut aalajangiiffigisassaattut siunnersuut. Periusissiaq piffissalersorneqassaaq piviusunngortinnissaanullu siunnersuusiortoqassaaq.

Uani oqaatigineqassaaq, misissuinerup annertusineranut atatillugu suliaq kingusinnerpaamik tunniunneqarnissaanut atatillugu aamma siunnersuutigineqarmat UKA2020-imi tunniunneqassasoq.

Periusissiaq tamakkiisoq tassa meeraanermiit ima oqaatigalugu meeqperivinniit inuusuttut ilinniarfiinut Pimmatiginnittarneq pillugu periusissiaq pitsaaliuinermi sunniuteqarnerpaassasoq ataatsimiititaliaq isumaqarpoq.

3. Siunnersuutip aningaasatigut kingunerisassai

Inatsisartut suleriaasianni § 33-mi allassimasut tunngavigalugit siunnersuutip piviusunngortinneqarnerani aningaasartuutit allaffissornermilu kingunissaritinneqartut siunnersuutip oqaaseqaataanut ilanngunneqassapput.

Siunnersuutip piviusunngortinneqarnerani aningaasatigut kingunissaritinneqartut siunnersuummut ilanngunneqarsimasut ataatsimiititaliamit maluginiarneqarput. Tamatumunnga saniatigut ataatsimiititaliaq allanik oqaaseqaatissaqanngilaq.

Naalakkersuisut allannguutissatut siunnersuutaannut tunngatillugu, misissuinerup meeqqat atuarfianiit ulluunerani paaqqinnittarfiinut aamma inuusuttut ilinniagaqarfiinut annertusineqarnerani pisariaqalissasoq aningaasartuutissat amerlanerulernissaat. Siunnersuutip piviusunngortinneqarnerani aningaasatigut kingunissaritinneqartut tamatumunnga naapertuuttumik nalunaarsorneqarsimasut ataatsimiititaliamit maluginiarneqarpoq. Siunnersuutip matuma akuersissutigineqarneratigut inatsisinik suliaqarnermut aningaasatigut kingussaritinneqartut toqqaannartumik allatorneqarsimasut siunnersuuteqartumit oqaatigineqarpoq. Tamanna ukiumut AC-fuldmægtigit marluk ukioq ataaseq atorfeqartinneqarneratut naleqassaaq, tassa 1.000.000 kr.

4. Ataatsimiititaliap inassuteqaataa

Ataatsimiititaliap isumaqatigiittup inassutigaa Naalakkersuisut **allannguutissatut siunnersuutaat** akuersissutigineqassasoq.

Taamatut oqaaseqarluni isumaliutissiisummilu allassimasutut paasinnillutik matumuuna siunnersuut ataatsimiititaliap aappassaaniigassanngortippaa.



Doris J. Jensen

Siulittaasoq




Mimi Karlsen

Siulittaasup tullia



Laura Táunâjik



Nivi Olsen



Sofia Geisler